

BULLE 1980

Hüt em Gumpelimitwochobed
wo rings um Wil scho d'Fastnacht tobend
erklär ich allne gross und chli
offiziell soll si hüt eröffnet si.

Do meint doch sonen Galgefritz
stoht i de Ziitig, s'isch kein Witz
Mit de Plaque, s'isch zom Lache
wöll d'FGW e Geschäft drus mache
Do möchtet mer hüt öppis säge
Wer tuet denn d'Wiler Chind verpläge?
Tuet Maske, Kostüm, d'Wäge poschte
Söll das uf einmol nüüt me choschte?
Es hätt drum b'schlosse d'FGW
me chönted doch de Tömmeli ne
als Knallfrosch chönd ich mir no denke
und en an nögschte Nörgeli henke.

Du findsch es i de ganze Stadt
so rund und grau und zementiert
d'Hünd lupfed s'Bei, d'Chind findets glatt
Die Dinger hends glaub importiert
Meinsch s'chönt en Schwobewahlkampf sii
Muesch nur die säbe Schnörri g'höre
Bi dene isch au nüüt debii –
nur vornedra e grossi Röhre!

Im Rothus obe hends schiints bschlosse
Mer nimmts zor Kenntnis, fascht mit Rüehrig
Jetzt werd au s'Südquartier erschlosse
es gäb e grösseri Underfüehrig.
S'isch klar, wie 2 mal 2 isch vier
De gröschti Tubel mues das gseh
die piffed doch uf's s'Südquartier –
s'isch alles wäg de PTT.

De Waxel Mirz hätt demissioniert
und bald stönds ohni Leitig do
Drü neu hends scho uusprobiert
Schiints lösed's no en vierte cho
s'goht nümme lang, hend's d'Operette
und die i ihrem Grössewahn
tüend giegele, du chöndsch fascht wette
nur underem Herbert Karajan.

Bim Läse han i überleit
Das sig vielleicht en Schnitzer gsi –

d'Tonhalle wird zom Studio
en Gemeindrot tuet d'Lüt motiviere
und kein Verein chas underloh
en jede sött fascht mitmarschiere.
«Wil, wie es singt und wie es lacht»
Mit tute, jödele und juhe
do druss wird z'erscht e Ufnahm gmacht
sogar e Platte sötts druss geh.
Das isch passiert vor langer Zit
und jede gseht au langsam i
Das mit em Wiler Platte Hit
isch glaub es chlisches Träumli gsi.

Do wött doch ein, es isch zom Lache
schiints no e dritti Halle mache
Nur eis a dem Projekt isch dumm
Es fehlt ihm d'Baubewilligung
No öppis wör üs interessiere
Wer tuet das Ganzi finanziere
De Charly Hü de hott halt Muet
Vor allem hett er Selbstvertraue
die Tennishalle chan er guet
ellei mit sinere Schorre baue.

Wenn das bi üs so wiitergoht
bi dem Verchehr vo früeh bis spoht
wird Dufourstross, du wersch es gseh
scho bald zor Champar Elisée
de Schwanenplatz zom Place Pigalle
und d'Oberstadt zom Sündefall
Denn simmer ehrlich, s'isch doch so
wie wönd die Planer üs verstoh
Die wohned uf de Bonzealp
und mached mit üs Chline s'Chalb
uf ihres Huus schiint d'Sunne druff
Wo wohned mir? Im City-Puff!

E Gmeindrotsitzig find ich toll
was die nöd all's z'bespreche hend
ich han hüt s'Sitzungsprotokoll
i Sache «Saalbau» i de Händ:

De Wechsi schickt de Stigeli us
er soll es Plänli woge!
Stigeli wött keis Plänli woge –
er tuet lieber Meiteli ploge –
– alles bliibt bim alte.

De Wechsi schickt de Lehrer us
er soll em eis diktiere
Lehrerli wött nöd diktiere
lieber Mühleli installiere

Do schickt de Wechsi s'Trübeli us
Er solli s'Wort ergriffe
Trübeli tuet nöd s'Wort ergriffe
s'Trübeli mues zerscht selber riife
s'Bölleli tuet Brief frankiere
s'Lehrerli Mühleli installiere
Stigeli tuet Meiteli ploge
– alles bliibt bim alte.

De Wechsi schickt de Brönschi us
er soll emol sondiere
Brönschi tuet nöd gern sondiere
lieber i de Beiz plagiere
s'Trübeli mues zerscht selber riife
s'Bölleli tuet Brief frankiere
s'Lehrerli Mühleli installiere
Stigeli tuet Meiteli ploge
– alles bliibt bim alte.

Jetzt schickt de Wechsi s'Lüdeli us
Er soll die Herre rüge
Lüdeli hett kei Muet zom Rüge
er tuet lieber Iseli büüge
Brönschi tuet halt gern plagiere
s'Trübeli mues zerscht selber riife
s'Bölleli mues Brief frankiere
s'Lehrerli Mühleli installiere
Stigeli tuet Meiteli ploge
– alles bliibt bim alte.

De Wechsi schickt de Titeli us
er soll es bitzeli marte
Titeli hät kei Speuz zum Marte
häckelet im Bluemegarte
s'Lüdeli tuet Iseli büüge
Brönschi tuet halt gern plagiere
Trübeli mues zerscht selber riife
s'Bölleli mues Brief frankiere
s'Lehrerli Mühleli installiere
Stigeli tuet Meiteli ploge
– alles bliibt bim alte.

Jetzt schickt de Wechsi s'Schöneli us
er soll ne eis verpasse
s'Schöneli tuet nöd verpasse
susich verpasst er denn no s'Jasse
s'Titeli isch im Bluemegarte
s'Lüdeli tuet Iseli büüge
Brönschi tuet halt gern plagiere
Trübeli mues zerscht selber riife
s'Bölleli mues Brief frankiere
s'Lehrerli Mühleli installiere
Stigeli tuet Meiteli ploge
– alles bliibt bim alte.

Jetzt zücht de Wechsi selber us
und hofft er find' ellei de Rank